



東華錄卷二

湘源蔣良騏千之父

天聰四年正月辛^巳朔大軍抵灤河壬午至
永平甲申攻克之兵備道鄭國昌知府張鳳
奇推官羅成功皆仰藥死戶部郎陳此心兵
備道白養粹草職副將孟喬芳等皆降丙戌
留貝勒濟爾哈朗等兵一萬守城大軍向山

海關進教擢白養粹為巡撫孟喬芳楊文魁
為副將戊子孟喬芳楊文魁遊擊楊聲遠
自永平來見諭曰朕不似爾明朝之君與臣
下情意隔絕凡我臣僚皆令侍坐各吐衷曲
飲食同之己丑命教漢等部蒙古兵攻昌
黎縣諭以克城財物任取教漢等諸貝勒樹
梯攻城為敵所推墮不能克

上聞曰昌黎兵甚少何難攻克遣達爾哈等
領千人助之復不克

上自携攻具攻之諭曰倘拔其城違命者悉
殲之城上木石鎗炮齊發火燎梯折回焚近
城廬舍而還明灤州降命固山額真納穆
秦等率兵守之命貝勒阿巴泰率護軍駐
防漢兒莊城辛丑遇明兵八營皆擊敗之

射殺其兵部尚書劉之綸

二月諭曰昨攻

永平城副將阿山葉臣與猛士廿四人冒火
登城乃我國第一等驍勇人也以後勿得再
令攻城但令立諸貝勒固山額真左右對敵
時同進彼自欲攻城亦宜止之廝卒中有一
二次率先登城者亦不可再令攻城以示朕
愛惜材勇之意

丙辰諭諸貝勒曰等爾蒙

天佑凡事皆當處之以義毋貪黷以利己毋
偏庇以徇人天人一理在下士卒悅服則天
心亦嘉與之矣自天聰三年十月征明抵
燕京轉克遵化永平灤州遼安諸地二月甲
子班師命貝勒阿巴泰濟爾哈朗薩哈廉偕
文臣索尼甯完我喀木圖率將士鎮永平文
臣鮑承先白克格率將士鎮遼安固山額真

圖爾格納穆秦偕文臣庫爾纏及高鴻中率

將士守灤州察哈喇偕文臣范文程率將士

守遵化三月庚寅命大貝勒阿敏貝勒碩

託率兵往代阿巴泰等鎮守永平灤州遼安

遵化等處四月辛酉貝勒阿巴泰濟爾哈

朗薩哈廉等率所部兵凱旋五月明華州

監軍道張春監紀官邱嘉禾搃兵祖大壽馬

世龍楊紹基副將祖大祿祖可法張宏謨劉
天祿曹恭誠孟徽等率兵攻灤州固山額真
納穆秦等屢擊却之阿敏碩託但遣大臣巴
都禮率數百人往援而盡收遼安守兵及居
民入永平明兵復攻灤州納穆秦等不能支
遂棄城奔永平明兵截戰我兵陣歿四百餘
人阿敏碩託將城內歸降漢官巡撫白養粹

知府張養初、太僕卿陳玉庭、行人崔及第、主
事白養元、知縣白珩、掌印官陳清華、王業宏、
陳元美、叅將羅墀、都司高攀桂等悉戮之。並
屠城中百姓，收其財帛，乘夜棄永平城而歸。
出冷口，其鎮守遵化察哈喇等亦棄城還衆。
貝勒大臣議阿敏十六罪，請誅之。
上免死，幽禁，奪所屬人口、奴僕、財物、牲畜、草

碩託貝勒爵。棄所屬人口。湯古代。希爾吉。納
穆秦。巴布泰。圖爾格。雅舜。備禦松俄圖。遊擊
恩特愛木布路。叅將布山。備禦黑勒尼馬察
郎什德爾。得赫。各坐罪有差。七月。定議。

太祖庶妃所生子。阿拜。塔拜。巴布泰。巴布海。
賴慕布。又弟之子。吳達海。塔津。拜伊圖。鞏阿
岱。舒爾恭。哈木加。族叔。吳霸席庫。撒哈席庫。

機爾塔席庫又姑母瑚雷與姨母之子相爾
肯卜賴吳巴泰吳齊勘分代席爾談發庫又
勒克舒子孫及顏布魯等俱免徭役

天聰五年正月造紅衣大將軍礮成鑄曰天
祐助威大將軍我國造礮自此始

上韋文館觀巴克達什海所驛譯武經內有
昔良將用兵有饋輦膠者投諸河與士卒同

流而飲夫簞醪不能味一河之水而思為致死
死者以滋味之及已云云

上諭曰觀古史所載將帥必體恤士卒如我
額駙顧三台與敵交鋒士有戰死者以繩繫
其足曳歸輕蔑士卒若此何以得其死力乎

三月以御書三角與兩大貝勒及議政十
貝勒八大臣令直言國是於是大貝勒代善

莽古爾泰、貝勒、阿巴泰、濟爾哈朗、墨爾根、戴
青、多爾袞、岳託、額爾克楚虎爾多鐸、杜度、薩
哈廉、豪格、固山額真、楞額禮、額駙達爾哈額
駙和碩圖、色勒喀克、篤禮伊爾登、葉臣各有
所奏。五月，命提兵官楞額禮、喀克篤禮率
兵征南海島。六月，親定功臣襲職例。七
月，議設統兵卒將，每固山額真下兩翼各設

梅勒額真一員。每甲喇各設甲喇額真一員。
其隨從紅衣礮大將軍礮令。總兵官佟養性
管理。又定官制。設立六部。每部以貝勒管
理。其下設承政、叅政、啓心郎。改巴克什為
筆帖式。本賜名者仍之。聞明、總兵、祖、大壽
等興築大凌河城。晝夜督催。因統大軍征之。
八月壬寅。次舊遼河。蒙古諸貝勒各率兵來

會 癸卯命貝勒德格類岳託阿濟格率兵
由義州進發屯于錦州大凌河之間以俟

丁未兩路軍俱抵大凌河時城墻已完遂進
圍之

上以攻城恐傷士卒乃命楞額禮達爾哈率
本旗圍北面之東阿巴泰率護軍在後策應
覺羅色勒圍正南莽古爾泰德格類在後策

應宗室篇古圍南之西濟爾哈朗策應吳納
格圍南之東喀克篤禮圍東之北多鐸策應
伊爾登圍東之南多爾袞策應和碩圖圍西
之北代善策應鄂本克圍正西葉臣圍西之
南岳託策應蒙古諸貝勒各率所部兵圍其
隙處俟養性載礮當錦州大道而營諸將各
固守汛地勿縱一人出城又環城掘壕深廣

各丈許。壕外築牆高丈許。牆上加垛口。牆內
距五丈餘地。又環掘壕。廣五尺。深七尺五寸。
壕上鋪秫秸。覆以土。營外亦掘壕。深廣各五
尺許。城內外不能通出入矣。辛亥。招降大
凌河西山一臺。城南岡一臺。壬子。繫書于
矢。射入大凌河城。諭諸蒙古。癸丑。明兵出
城。誘戰。副將孟垣坦屯布魯魯備禦。多貝侍衛。

戈里及士卒十人歿於陣。是日以礮攻降城西南隅一臺。甲寅大凌河岸一臺降。又以礮攻城東一臺崩。丙辰城北山岡一臺降。丁巳明兵二千自松山來援前哨阿山等擊敗之。甲子命濟阿格等率精兵往錦州松山遮擊明援兵。丁卯明兵六千來攻阿濟格營。時大霧覲面不相識。及敵將至有

青氣自天衝入敵營霧中開如門于是阿濟
格碩託列陣以待大敗敵兵追至錦州城擒
遊擊一員獲馬二百有六 八月辛未大凌
河城內兵突出我兵夾攻敗之 九月乙亥
命譚布邀擊明兵出城樵採者 丁亥聞明
兵援錦州

上率親隨護軍前行明兵七千潰遁斬將副

一員收軍拜天。庚寅令卒偽為錦州援兵。上親率護軍伏于山內。祖大壽見之率兵出城。宗室篇古等四營齊出。明兵大敗。

上率伏兵掩至。敵奔入城。自是不敢復出。

乙未。明太僕寺卿監軍道張春。總兵吳襄。鍾緯等率副將以下百餘員。馬步兵四萬來援。過小淩河。

上欲擊之。見其壁壘嚴整，乃止。戊戌，明兵起營，趨大淩河，距城十五里立營。我先遣精銳扼敵歸路，兩翼兵直衝其營。敵陣堅不動，火器齊發，聲震天地。我右翼衝入，明總兵吳襄副將桑阿爾寨等先奔。時有黑雲從風西來，向我軍。敵乘風縱火，勢甚熾。將逼我陣，天忽雨，反風向敵。敵遂潰，遇伏悉殲焉。生擒張春。

張洪謨等三十餘員盡獲其駝馬器械張春
獨不跪。

上怒援弓欲射之代善諫曰此人欲以死成名奈何殺之以遂其志遂置之是戰也祖大壽復以偽計誘故無一人出者是晚遣賜張春珍饌春不食固求死餓二日復賜食乃受而食之後每食

上皆親閱以賜。十月遺祖大壽書招之降。
未幾大淩河糧盡析骸而炊殺人而食大壽
欲突圍不得復遣陣獲叅將姜新招之大壽
降志乃決遣其養子祖可法為質諸貝勒問
曰爾等死守空城何意曰因前屠戮遼東永
平降民是以畏死耳岳託曰遼東之事我等
不勝追悔永平乃二貝勒阿敏所為已論罪

幽禁矣。戊戌大壽，殺其副將何可剛，以降可剛含笑而死。十一月，縱祖大壽入錦州。丁巳，大軍旋。張春不肯薙髮，令與白喇嘛同居三官廟。

天聰六年正月，管兵部事貝勒岳託言：先年克遼東、廣寧，誅漢人拒命者，後復屠永平、灤州，以是人懷疑懼。綬極力曉諭，人亦不信。今

天以大淩河與我。臣愚以為當善撫養。撫養之道。當先予以家室。凡一品官。以諸貝勒女妻之。二品官。以國中大臣女妻之。仍出公帑。以給其需。各官宜令諸貝勒人給粧莊一奩區。復察各牛录下。寡婦給配。各官役人。至明之兵士。察漢民女子。寡婦。及八貝勒下。莊頭女子。令其給配。其餘更令殷實商賈。分給婚配。毋

致一人失所。則人心歸附。而大業可成矣。嘉
納之。賜門都號。阿尔薩蘭土謝圖布庫杜
尔麻彌唐布庫特木德赫號。巴尔巴圖魯布
庫三人。皆蒙古人。膂力絕倫。善角觝。二月。
以大凌河歸降。及俘獲漢人。分隸副將下各
五十名。叅將下各十五名。遊擊下各十名。盡
令移居瀋陽。以國中婦女千口。分配之。其餘

令國中諸貝勒大臣各分四五人配以妻室
善撫養之三月以國書十二字頭向無圈

點上下字雷同無別命巴克什達海酌加圈
點以分析之四月親率大軍征察哈尔次
都勒河聞察哈尔汗林丹奔庫黑得勒酥乃
還趨歸化城會有言察哈尔國左界與喀喇
莽奈之境相接因罷征明之師復進征察哈

尔。五月大軍次胡喇戶。以察哈尔遁復議
征明。大軍次木魯哈喇克沁。命貝勒阿濟
格等統左翼兵掠大同宣府一帶。濟爾哈朗
等統右翼兵掠歸化城。黃河一帶。六月遺
明書沙河堡官索回察哈尔逃入堡中人畜。
及賞察哈尔汗財物悉送出。遣官齎書諸
大同陽和宣府各官議和。甲午與明宣府

巡撫沈某。提兵董某等。議和定盟約。大軍還。
天聰七年正月。諭各牛录額真曰。田疇廬舍。
民生攸賴。勸農講武。國之大經。民間樹藝一
二。嚴飭徭役。勿累貧民。再督率所時。三時習
射。此係我國制勝之技。可不努力學習耶。
三月。遣貝勒濟爾哈朗。築岫巖城。貝勒阿巴
泰。築攬盤城。貝勒阿濟格。築通遠堡城。貝勒

杜度築鰲場城分兵駐守。五月明將孔有德耿仲明航海來歸。孔耿皆遼東人有德為毛文龍部下末弁遂以毛氏稱之。文龍為袁崇煥所殺。明登州巡撫調有德為管步兵左營叅將。仲明亦為叅將。我師圍大凌河。登撫調有德率騎兵八百應援。至吳橋縣遇叅將李九成遂同叛。率其黨陳繼功李尚友曹得

功等五十餘人招烏合數千攻陷山東臨邑
陵商河青城等縣遂圍登州城中耿仲明與
其黨杜承功曹德純吳進興等十五人為內
應城遂陷逐其巡撫時旅順叅將陳有時廣
廉島叅將毛承祿亦殺守吏叛至登州有德
自稱都元帥九成為副元帥仲明搃兵官攻
取各城堡山東擾亂明搃兵祖大弼率兵數

萬圍登州九成死戰有德不能支乃突圍由
海道來奔為旅順總兵黃龍所邀殺其副將
李應元田良祚朝鮮復助明邀擊會我貝勒
濟爾哈朗阿濟格杜度勒兵迎於江岸明兵
及朝鮮退有德等部眾家口不遺一物諭令
安插東京賚馬百匹六月癸酉封孔有德
為都元帥耿仲明為總兵官七月貝勒岳

託德格類及孔有德等攻克明旅順口俘人
五千三百餘馬牛等數百銀二萬一千二百
兩金二十二兩緞疋三千有奇衣二千七百
有奇布二萬四千餘疋人參八箱他物稱是

八月壬戌遣貝勒阿巴泰等統兵二千略
明山海關一路俘人畜四千二百有奇十
月明廣鹿島副將尚可喜輸款于我

天聰八年正月朔旦御殿命孔有德耿仲明
與和碩貝勒同列于第一班行禮 乙巳

上御中殿命阿爾薩蘭與土謝圖濟農巴達
禮札薩克圖杜稜布塔齊噶爾珠塞特爾三
貝勒下選拔力士六人較力阿爾薩蘭一一
高舉擲之人稱奇勇 遣官營造孔有德耿
仲明第宅二人固辭不允 尚可喜招撫長

山石城二島携人民數千戶來歸。二月命

阿山等率管護軍大臣鰲拜等略錦州。三月

戊子還。辛卯命譚泰圖爾格略錦州。命

孔有德耿仲明之姦以白廂皂尚可喜姦于

皂旗中用白圓心為飾。四月以瀋陽為天

眷盛京赫圖阿喇城為天眷興京。授尚可

喜提兵官遣歸海州。辛巳初命禮部考取

通滿洲蒙古漢書文義者為舉人十六人各
賜衣一襲免四丁宴于禮部 五月分辨步
騎守哨等兵名色以隨固山額真行營馬兵
為騎兵步兵為步兵護軍哨兵為前鋒駐守
盛京礮兵為守兵間駐兵為援兵外城守兵
為守邊兵舊蒙古右營為右翼兵左營為左
翼兵舊漢兵為漢軍孔有德為天祐兵尚可

喜為天助兵。征東海虎爾哈部。李思哈。吳
巴海。遣人奏捷。俘獲男婦馬牛皮張各有差。

七月。

上親率大軍。由宣府略朔州一帶。定議四路
兵。俱于七月初八入邊。八月。命諸貝勒率
兵略山西。代州。朔州等路。甲子。攻克應州
石家村堡。甲戌。

上閱大同城 壬午大軍至懷遠 癸未大

軍至左衛城南駐營 閏八月甲申駐城東

丙戌駐左衛河北 丁亥攻萬全左衛城

克之 庚寅班師 十二月命梅勒章京霸

奇蘭甲喇章京薩木什喀率兵征黑龍江

分定專管牛录 遣吳巴海荆古尔代率兵

征瓦爾喀

天聰九年二月以和碩墨爾根戴青貝勒多
爾袞貝勒岳託薩哈廉豪格為統兵元帥固
山額真納穆秦為右翼吏部承政圖爾格為
左翼率護軍及精兵萬人往收察哈爾林丹
汗之子額爾克孔果爾額哲上年察哈爾亂
其汗已死其屬來歸者紛紛故有是舉 四
月霸奇蘭等捷音至收服壯丁二千四百

八十三人口七千三百有二俘婦女幼稚一
百十六牲畜他物稱是吳巴海等捷奏至
收撫壯丁五百六十婦女五百口幼稚九十
又俘婦女六十六牲畜他物稱是五月命
和碩額尔克楚虎尔貝勒多鐸等率兵入寧
錦界明兵禦我大凌河奔潰追斬其副將劉
應選擒遊曹得功殲其兵五百人距錦州松

山城五里收軍還。多尔袞等奏大軍至西

喇朱尔格遇察哈尔汗妻囊囊太后瑣諾木

台吉率一千五百戶降隨渡黃河抵額哲所

駐托里圖其國無備額哲及其母蘇泰太后

率衆寨桑并部民干若千戶歸降是歲東方之

國兩次來歸察哈尔舉國內附各處蒙古俱

歸降惟明國僅存然國事日非亡不久矣。

八月多尔袞等凱旋獲歷代傳國玉璽相傳
茲璽元順帝携逃沙漠後遂遺失越二百餘
年牧羊者見羊三日不食以蹄跑地掘獲之
後林丹汗今得于蘇泰太后所其文漢篆制
誥之寶四字璠璣為質交龍為紐光氣煥爛
洵至寶也多尔袞等三貝勒率兵並察哈
爾汗子額尔克孔果爾額哲及其大臣畧明

山西一帶自平魯衛入朔州抵長城經寧武
關代州忻州崞縣黑峰口應州而復還平魯

斬明兵六千餘人俘人畜七萬六千二百有
奇乃出邊凱旋設蒙古都統八旗各一下

設副都統叅領各二 正月詔

太祖庶子稱阿哥六祖子孫俱稱覺羅命繫
紅帶以別之如人相抵不得言及祖父違者

擬死。此條補錄。

崇德元年二月，定諸臣冠飾，各賜金頂以示別。因賜超品公額駙揚古利、宗室篇古、嵌東珠、金頂、滿洲、蒙古、漢軍固山額真、承政等，以寶石、金頂。三月，改文館為內三院：一內國史院，一內祕書院，一內弘文院。諭諸臣曰：喇嘛等以供佛持戒為名，潛肆奸貪，直妄人。

耳。蒙古諸人深信其懺悔。超生等語。致有懸
轉輪結布播之事。嗣後俱宜禁止。四月。羣

臣上尊號曰寬溫仁聖皇帝。改天聰十年為
崇德元年。定有天下之號曰清。追尊始祖

澤王。高祖慶王。曾祖昌王。祖福王。皇考尊諡
曰承天廣運聖德仁功肇紀立極仁孝武皇
帝。廟號太祖。陵曰福陵。皇妣尊諡曰孝慈昭

憲順德貞順成天育聖武皇后。封諸貝勒。

為親王。郡王有差。五月。命武英郡王等率

師征明。七月。武英郡王等會師出延慶州。

俘人畜一萬五千有奇。九月。武英郡王阿

濟格等奏。我兵入長城。過保定。至安州。克十

二城。五十六戰皆捷。生擒總兵巢丕昌等。獲

人畜十八萬。十二月。親征朝鮮。前鋒至王

京李侗遁南漢山城我軍圍之己亥

上率大軍由城外徑渡漢江抵南漢城西朝鮮屢來援皆敗之

崇德二年正月以書諭朝鮮國主是日李侗稱臣上書謝罪取江華島獲朝鮮王妃一閣臣侍郎各一人並財物及羣臣家口二月壬申班師李侗出王京城跪送諭曰爾人

民家口已盡付還矣。命送還王京。四月武

英郡王阿濟格攻克皮島。斬守將沈世奎。

命固山貝子尼堪羅託博洛等與議國政。每

旗各設議政大臣三員。六月甲寅。

上夜夢至興京謁

太祖。太祖騎而馳。禮親王代善挽之不及。既而恍入明宮中。見一人以絲絛綏飾珊瑚授

之。以為明萬曆帝欲無受諦視乃金代神像。
出一編授曰。此金國史也。及覺召內院儒臣
告之。對曰。昔上夢入朝鮮宮。果得朝鮮今夢
入明宮。授以前史。蓋天之歷數在。

皇上矣。先是遣章京尼堪等征瓦爾喀。至
是降之。十一月命葉克書星納等征掛爾
察。是年分漢軍為左右翼。旗色皆用元青石。

廷柱為左翼都統馬光遠為右翼都統四年

分漢軍為廂黃廂白廂紅正藍四旗七年分

八旗

八旗次序廂黃正黃正白旗三正紅廂白廂紅正藍廂藍旗下五八旗方位廂黃

正白廂白正藍為左翼正

黃正紅廂紅廂藍為右翼

崇德三年五月親征喀爾喀旋師七月更

定六部理藩院都察院八衙門官制每衙門

設滿洲承政一員以下設左右叅政理事副

理事主事等官共五等。諭禮部有效他國

衣冠束髮裹足者重治其罪。八月先是禮

部承政甲喇章京祝世昌條奏俘獲敵人妻女

不可令其為娼妓一疏奉旨切責至是會

訊以世昌身在本朝其心在明國護庇漢人

與姦細無異應論死命免之以啓心郎孫應

時代為改正依議正法。賜中式舉人羅碩

等十名。各朝衣一領。授半個牛录章京品級。
各免人丁四名。一等二等三等生員各賜紬
布。授護軍校品級。免一丁二丁有差。九月。
命睿親王多尔袞為奉命大將軍。貝勒豪格。
阿巴泰副之。統左翼。貝勒岳託為揚武大將。
軍。貝勒杜度副之。統右翼。兩路征明。岳託
等從密雲東北牆子嶺口。毀牆分四路入。遇

明總督吳阿衡兵六千敗之。又連敗其副將
守備援兵。我軍所入之關。漢名墻子嶺。蒙古
名達吉布拉。墻子嶺西一關。漢名黑峪。關蒙
古名黑呼龍。又一關。漢名曹家寨。蒙古名海
龍。又一關。漢名古北口。蒙古名莫爾托石。墻
子嶺東一關。漢名將軍石。蒙古名烏什根。又
一關。漢名黃崖口。蒙古名章。又一關。漢名馬

蘭峪。蒙古名馬賴。多爾袞等自董家口東
青山關西。由邊牆缺處毀牆入。

上以明人聞我二路進兵。則山海關以東。寧
遠。錦州兵必往西援。欲牽制其援兵。十月命
鄭親王濟爾哈朗。貝子碩託各率本旗護軍
及喀喇沁兵。從前屯衛寧遠中間進發。豫親
王多鐸。貝子博洛亦率護軍及土默特兵。從

寧遠錦州中間進發

上親率大軍從義州一路進發

是月多鐸

等聞桑噶爾寨舊居之堡無備攻克之戮其

守備及男子獲婦女男丁及牲畜

恭順王

孔有德懷順王耿仲明智順王尚可喜以神

威將軍礮攻戚家堡石家堡克之俘其人口

牲畜十一月豫親王多鐸兵過中後所會

明愍兵祖大壽率兵往援燕京路遇遂來襲
我兵陣沒者九人失馬三十匹大軍進發

山海關

上親統大軍至中後所祖大壽見我軍至退
入城內

上賜之勅不報鄭親王濟爾哈朗克模龍
關又攻克五里堡屯臺獲人畜又縱掠獲人

口二百餘馬牛等共數百

庚午大軍自中

後所班師

崇德四年正月封新附總兵官沈志祥為續

順公

二月乙未遣漢軍固山額真昂拜章

京石廷柱馬光遠率兩旗兵運紅衣礮西征

明國

丁酉命武英郡王阿濟格率將士征

明

壬寅

上親統大軍征明 壬子

上登松山南岡相度城垣形勢指示孔有德
耿仲明尚可喜石廷柱馬光遠命各依汛地
用紅衣礮攻擊明日孔有德等各移礮前進
城堞盡毀明副將金國鳳死守會日暮召諸
將還是夜城中干攻毀處以繩繫木覆之以
土比明城已築固諸將進攻不能入我軍陣

亡二十人。乃命勿攻。命阿濟格等率四旗護
軍環守塔山連山。三月戊午朔。明太監高
起潛。搃兵祖大壽。自寧遠遣兵九百。船十隻。
由水路援杏山。我兵擊之。獲船一艘。殺五十人。
命三順王及石廷柱馬光遠等。于松山城
南穿地道。丙寅。征明睿親王多爾袞貝勒
杜度。遣官奏報。左翼多爾袞疏曰。臣等毀明

邊關而入兩翼兵約會于通州河西由北邊
過燕京自涿州分兵八道一沿山下一沿運
河于山河中間縱兵前進燕京迤西千里內
六府俱已蹂躪至山西界而還復至臨清州
渡運糧河攻破山東濟南府至京南天津衛
克城三十四降城六敗敵陣十七俘人口二
十五萬七千八百八十將士無一傷者右翼

杜度疏曰臣等從明燕京西至山西界南至
山東濟南府蹂躪其地克城十九降城二敗
敵陣十六殺其搃督二及守備以上官百餘
員生擒親王郡王奉國將軍各一俘人口二
十萬四千四百二十三金四千三十九兩銀
九十七萬七千四百六十兩兩翼俱從遷安
縣回經平太寨出青山關四月凱旋我阿

爾薩蘭於錦州烏欣敗明援兵擒副將楊震
上親率四旗護軍馳往錦州縱兵攻其山寨
敗之沿山搜勦兩夜斬副將徐永昌擒副將
祖克勇我兵三路穴地攻松山城不能克
罷之遣騎兵往助阿濟格守塔山車駕自
松山還錦州西北駐營阿濟格畧連山獲
人馬千計五月命鄭親王濟爾哈朗等略

明松山錦州杏山等處 辛酉

上班師 濟爾哈朗奏報自入明邊敗敵九

次俘獲二千三百二十 九月遣武英郡王

阿濟格貝勒阿巴泰杜度等率兵略錦州寧

遠 十月遣肅親王豪格貝勒多鐸等略錦

州寧遠 十一月豪格報寧遠兵出北山岡

擊敗之斬總兵金國鳳及其二子

薩木什哈喀等征索倫龍部

崇德五年正月遣翁阿岱多濟里等率將士
戍防錦州二月遣碩翁科羅巴圖魯勞薩
率將士往廣寧投生三月命鄭親王濟爾
哈朗貝勒多鐸率兵修義州城駐劄屯田令
山海關外寧錦地方不得耕種征往索倫
虎爾哈部索海薩木什喀奏報共獲男子三

千一百五十四婦女二千七百一十三幼小
一千八十九他物稱是 五月濟爾哈朗等

至杏山迎降人蒙古蘇班代明總兵祖大壽

吳三桂劉智周遊擊戴明共兵七千來逼我

軍縱擊大敗之擒副將楊倫周延州叅將李

得位 壬寅

上率八旗護軍騎兵向錦州進發 乙巳至錦

州攻降城北晾馬山臺盡刈錦州城東禾稼
六月命睿親王多爾袞肅親王豪格貝勒
杜度阿巴泰等往代濟爾哈朗等于義州築
城屯田 六月諭多爾袞等將兩翼兵暫行
分駐一斷敵往來之路一投誠人可乘便而
來一我兵易于收穫弗為敵乘間竊刈其已
收糧草擇堅固兩處存貯 多爾袞奏七月

初八日夜明錦州兵五百來襲我廂藍旗貝

子羅託公吞齊等擊敗之遣前鋒統領吳

拜率兵一半往助睿親王軍並傳諭睿親王

肅親王前次擊敵殊為失策敵來但固守營

壘俟相近乃可擊前此迎戰非計也

丙午遣席特軍濟席哈等率兵並徵外藩兵

東征索倫部落睿親王等奏錦州馬兵二

千出城我軍擊敗之獲馬百餘又伏兵寧遠
路獲明關內所運米千石及騾馬等殺押車
卒三百九十八月命叅領希福等往張家
口交易九月命鄭親王濟爾哈朗武英郡
王阿濟格郡王阿達禮貝勒多鐸羅洛宏等
率將士一半往代睿親王等圍錦州松山
初九日睿親王等悉衆出誘敵于杏山城北

山嶺聞松山騎兵出馳擊敗之及還敵復來
襲又擊敗之掩殺至松山城下及還松山兵
又出亦敗之多鐸率兵夜往錦州西桑噶

爾寨堡設伏敗明伏兵追至塔山又聞敵夜
于杏山間運糧遣兵往略擒斬百人獲牛驢
百十一月命睿親王多尔袞肅親王豪格
貝勒杜度阿巴泰率將士之半往伐鄭親王

等圍困錦州。十二月，出征索倫部、席特席等，奏報于齊洛台地方，擒獲博穆博果爾及其妻子家屬男婦幼稚九百五十六，馬牛八百四十四。

崇德六年二月，先是命戶部察滿洲、蒙古十六旗下牛、畧、各以人口牲畜註冊，分別貧富具奏。至是，部覆將貧窮牛畧之該管章京等

解任諭曰牛录下貧乏皆因章京及撥什庫
等耽嗜飲酒荒惰職業之故又諭王貝勒大
臣曰尔等何不親率人習射耶子弟壯者當
令以角弓羽箭劣者以木弓柳箭我國武功
首重習射不習射之罪非用烟可比用烟之
禁前因尔等私用故不能治人至于射藝切
不可荒廢嗣後嚴加督率多尔袞等奏報

臣等圍困廣寧山城時擊敗錦州松山援兵
四百餘斬二百餘人固山額真阿山襲取山
城之小者俘男婦六十餘索海雅舜及安平
貝勒屬下兵共擊斬錦州兵一百七十餘人
三月蒙古巴圖等率男婦九百餘毀大同
陽和邊牆叛明來降多爾袞曾私遣甲兵
還家又移軍過國王碑離錦州三十里駐營

上聞大怒曰。原令由遠漸近圍逼錦州。所以困之。今離城遠駐。敵必多運糧草入城。何時能得錦州耶。因降勅切責。至是發兵。命鄭親王濟爾哈朗。更換多爾袞等還。至遼河。命出征諸王貝勒貝子公固山額真梅勒章京護軍統領及議政大臣等官俱駐于舍利塔旁。不許入城。遣大臣訊狀。凡倡言遣五人還家。

者即指名舉出尔等應得何罪自得行定議
具奏睿親王肅親王及二貝勒等皆引罪

上益怒降睿肅二王為郡王罰銀阿巴泰以
下各罰銀有差始許入城命朝鮮提兵柳

琳等率兵往助鄭親王軍鄭親王濟爾哈

朗武英郡王阿濟格郡王阿達禮貝勒多鐸
等圍困明錦州每面立八營遠營浚深壕沿

壕築堞口。兩旗之間。復浚長壕。近城設邏卒。

哨探。城中蒙古呼曰。爾等圍困何益。城中積

粟可支二三年。縱困之。豈可得耶。邏卒應曰。

無論二三年。縱有四年糧。至五年後何復所

食。于是城中蒙古貝勒諾木齊吳巴什。渾錦

等。知我志在必得。謀來降。遣人持書縋城約。

二十七夜進兵。二十四日。祖大壽聞欲擒之。

吳巴什等率關內兵與戰我軍聞之至城下
策應蒙古縋繩我軍援繩齊上明兵敗入城
內我軍據其外城降蒙古官屬八十六員男
婦六千二百餘名口捷音至

上大悅命八門擊鼓召衆于篤恭殿宣捷
四月明援兵自杏山至松山濟爾哈朗阿達
禮羅洛宏等伏兵于錦州南山山西岡阿濟格

多鐸等伏兵于松山北嶺令前鋒兵誘敵伏
發大敗之斬百七十級獲馬百十六匹甲七
十六副遣孔有德尚可喜各率本部將士
赴錦州助鄭親王軍六月命多爾袞豪格
率將士之半往代鄭親王等圍錦州從內
三院大學士范文程等奏于滿漢蒙古內考
取生員舉人明闕內援兵由松山城沿海前

進我左翼兵追及敗之于松山城壕獲馬五十餘匹。庚午睿郡王等奏報明關內援兵由松山來我兵追擊五里獲馬五百七十匹。七月命耿仲明孔有德尚可喜梅勒章京連德成曹德選吳進功等率將士助圍錦州。漢軍固山額真石廷柱言我軍圍困錦州度明必與我併力一戰此時現在圍城者不

必更換。仍將應換之兵。挑選精壯。秣馬以待。
一旦有警。我軍縱橫馳擊。大創一番。敵寒心。
喪胆。錦州從此失持。不能固守矣。錦州破。則
關外八城震動。安知非當年瀋陽得而遼陽
隨破。沙嶺捷而廣寧隨之順。一大機會哉。

八月。

上聞明洪承疇等率兵十三萬來援錦州。即

傳檄各部軍馬星集京師于十五日起行命
鄭親王留守戊午渡遼河壬戌至松山陳師
于松山杏山之間自烏欣河南山至海橫截
大路駐營謂諸臣曰但恐敵聞朕親至將潛
逃耳如不逃朕必令尔等破此敵如縱犬逐
獸易如拾取不致勞苦也是時明兵于松山
城北乳峯山岡結營合騎步兵號十三萬其

領兵總督洪承疇巡撫邱民養仰兵備道張
斗姚恭王之楨兵部郎中張若騏總兵王樸
李輔明唐通白廣恩曹變蛟馬科王廷臣吳
三桂及副叅遊守二百餘員見

上親率大軍大懼合謀退遁八月癸亥明
總兵八員率兵犯我前鋒地我軍擊敗之追
至塔山獲其筆架山積粟十二堆是日浚壕

斷絕松山杏山路。是夜明諸將皆欲遁。撤其
七營步兵迎松山城而營。甲子敵犯廂紅
旗汎地擊却之。

上諭諸將曰。今夜敵必遁。命兩翼八旗護軍
及旗^騎兵蒙古兵前鋒兵比翼排列直抵海邊。
敵遁百兵則以百人追之。千兵則以千人追
之。敵衆則躡後追擊。直抵峪山。是夜初更明。

搃兵王樸唐通馬科吳三桂白廣恩李輔明
等率馬步兵沿海潛遁我軍相繼追擊

上又命蒙古固山額真庫魯克達爾漢阿賴
等率各所部伏杏山路遮擊遁入杏山敵兵
又命睿郡王等率四旗護軍往錦州大路至
塔山大路橫擊之又命將往筆架山防護糧
糗又命鎮國將軍巴布海等各率所部往塔

山截其路有奔至悉戮之又命武英郡王率
兵亦截塔山路倘敵欲越塔山當率巴布海
等自寧遠直抵連山追擊又命固山貝子博
洛率兵往噶爾寨堡截擊又聞明郎中張若
騏從小凌河乘舟遁命梅勒章京賴護等率
兵追之又命固山額真譚泰率往兵小凌河
西絕其歸路又命梅勒章京多濟里追擊敗

兵又命固山額真伊拜等于杏山四面截擊
敵之奔入西山者又命固山額真恩格圖等
追擊逃兵悉如睿算明兵竄走彌山遍野自
杏山以南沿海至塔山一路赴海死者不可
勝計乙丑命固山額真劉之源携紅衣礮
同睿郡王武英郡王攻克四臺擒其副將王
希賢叅將崔定國都司楊重鎮等擒兵吳三

桂王樸奔入杏山。是日

上移營松山。其夜曹變蛟率乳峯山馬步兵
棄寨遁。欲衝圍去。其兵一半突入御營。時大
臣侍衛俱未至。軍中大驚。侍衛坤獨守營門。
拒敵。變蛟中創奔還松山。丁卯。命宗室錫
翰。國戚多爾濟等率兵伏於高橋大路。及桑
噶爾寨堡。以杏山逃兵必由此路。果有千人。

自杏山出伏兵敗之追至塔山斬獲甚多是
晚命貝勒羅洛宏貝子博洛內大臣圖爾格
等率精兵隨多鐸設伏杏山西臺己巳吳
三桂王樸從杏山出奔寧遠我兵截大路追
擊三桂等奔至高橋多鐸等伏兵縱擊三桂
王樸僅以身免多鐸等各還營壬申命內
大臣趨品公塔瞻伊爾率登每旗精兵五十

名設伏高橋方出營遇明兵千人追斬之至高橋遇明兵六百八十盡殲之是役也破明兵十三萬如摧朽拉枯計斬級五萬三千七百八十三獲馬七千四百四十四駝六十六甲胄九千三百四十六副明兵自杏山南至塔山赴海死者甚衆所棄馬匹甲胄以數萬計海中浮屍多如鴈鶩其被我圍于松山

者。總督洪承疇。巡撫邱民仰。兵備道張斗姚。
恭王之楨。通判袁國棟。朱廷榭。同知張為民。
嚴繼賢。總兵王廷臣。曹變蛟。祖大樂。士卒_等不
過萬餘。城內糧且絕。勢亦窮蹙。我軍復掘壕
困之。總兵吳三桂。王樸。白廣恩。馬科。李輔明。
唐通。郎中張若騏等。各路潰竄。壬申。前鋒
叅領努山等。自明董家口。喜峯口。偵探回奏。

擊敗明步哨五十一營斬百四十五人騎哨
十一人擒守備一 九月乙酉命貝勒杜度
阿巴泰固山額真譚泰阿山葉克書準塔巴
圖魯何洛會馬喇希巴特瑪等圍守錦州貝
勒多鐸郡王阿達禮貝勒羅洛宏固山額真
宗室拜尹圖公艾度禮額駙英俄尔岱庫魯
克達爾漢阿賴恩格圖伊拜等圍守松山武

英郡^王阿濟格外藩科尔沁國卓禮克圖親王

吳克善巴圖魯郡王滿珠習禮等圍守杏山

高橋 乙未遣學士額爾黑往諭鄭親王濟

尔哈朗武英郡王阿濟格阿達禮貝勒多鐸

等曰錦州松山所掘壕塹可周圍巡視其城

外薪草即令我兵割取 丙申一鼓松山城

內外馬步全出犯我廂黃旗汛地我兵擊敗

之斬千十七級獲其兵器 十一月甲辰命
鎮國將軍阿拜率兵往錦州南乳峯山駐防
乙巳命孔有德尚可喜率本部兵駐防錦
州 十二月甲寅濟爾哈朗奏報洪承疇以
兵千人夜犯我營我軍擊敗之斬四百餘級
敵退入松山城門閉不得入兩日之內收服
二千餘人其從杏山宵遁者為我伏兵所殺

凡五百七十四人。丙寅命祖澤洪赴錦州。
索取妻子。說其父大壽。澤洪至錦州。未得交
語而還。



